

# Ricordi zitellini

Stonde di gioie la sera  
In i fuconi fumicosi  
Cù le fole dopu cena  
Accantu à la brosta rossa  
E dopu in la notte nera  
Si diventa peurosu.

Babbone contava storie  
Incù mammone à la pignatta  
Mamma ella sempre fora  
Curava la so infurnata  
Babbu sempre in la machja  
Turnava la so bandata.

E stonde sottu à i castagni  
A ombria è à sulia  
Cù le spine in la manu  
O quant'ellu si suffria  
Un basgiucciu di mammone  
E tandu si ripartia.

O le stonde per li prati  
A rotte à fughe in le filette  
Ghjunghjiamu tuttu sfiatati  
A l'orlu di lu « Puzzettu »  
E tandu quelle inciuffate  
Facianu i più belli effetti.

Eppo le stonde spaventu  
A la ghjunta di l'inguernu  
Tandu soffiava lu ventu  
E ci portava l'affannu  
Mamma è babbu à lu tempu  
Un devianu dà capu.

Isse stonde oghje sò finite

Ancu e fole sò fughjite  
Noi simu bè ingrandati  
E qualcosa avemu capitu  
Chi la vita hè ingrata Bis  
E chi nunda hè graditu.

*Esse.*